

Discurso di Shon Pe Krozendijk na ocasion 75 aña di existencia di RCA

"Una vez RCA, semper RCA"



SOLITO- SV RCA di Solito, a celebra su di 75 aña di existencia y na e ocasion aki, a tuma lugar un Santo Sacrificio di Misa pa recorda e hecho grandi aki.

Na e ocasion aki, Shon Pe Krozendijk, un die fanaticonan grandi di e ekipo di RCA sin duda algun, a hiba palabra na e ocasion aki, pa gradici tur cu a haci di RCA, loke cu e ta awe.

"Reverendo Pastoor, rumannan den Cristo, bon dia.

Den nomber di Directiva di RCA permiti mi hiba palabra awe mainta den cas di nos Dios Todopoderoso.

Nos por a lesa den medionan di publicidad y pa ser mas specifico den prensa escrito cu nos club stima RCA ta celebra 75 aña di existencia y

tambe nos por a lesa algun di nos exitonan.

Si nos mira bon di tur equipo aki na Aruba loke ta concerni futbol, RCA ta e unico organizacion cu su equiponan a keda na bida durante un trayectoria largisimo den futbol.

Tin hopi equipo cu tambe a cuminsa hopi aña atras den futbol pero lamentablemente segun tempo tabata avanzando e equiponan aki o sea e futbol a desaparece te cu ta nan nomber so a keda.

E suerte cu RCA tabatin y cu te ainda nos tin, ta e amor cu tur hende cu dreña den nos organizacion tin pa e club. Te hasta hungadornan cu pa un motibo of otro a wordo cumpra pa cierto teamnan aki na Aruba ta bisa bo cu diep den nan curazon nan ta keda RCA.

Ta pesey tin un dicho / proverbio cu a nace cu tempo y ta bisa: "Una vez RCA, semper RCA" pues RCA pa bida.

Rumannan laga nos no lubida cu actualmente nos ta e campeonnan di Aruba. Ojala cu nos bolbe sali campeón y duna nos club e regalo di mas bunita riba e celebracion di su 75 aña di aniversario. E celebracion aki ta henter aña

e mester bai wordo recorda.

Nos sa cu actualmente tin un Directiva nobo. Nos ta spera di curazon cu nos Creador lo ilumina, guia boso p'asina boso sigi cu e tarea di hiba nos club dilanti.

Nos ta spera tambe cu tur miembro cu di curazon tin RCA na pecho pa duna e cooperacion necesario ora esaki wordo pidi.

Rumannan intencionalmente mi no a trece dilanti kiko RCA a nifica pa nos pasobra esey nos tur sa. Importante ta pa nos para un rato keto kico ta nifica 75 aña di existencia.

Hopi di nos den e misa aki no tabata na bida o mihor bisa no a ni nace ainda. Pero e existencia aki ta ilustra cu RCA semper a conoce Directivanan dinamico, organizatorio cu a traha semper cu amor, perseverancia y cu alma y cuerpo pa nos club stima sigi padilanti.

Ta nos mas sincero y ferviente deseo pa esaki continua den futuro. Cu Papa Dios bendiciona nos Directiva actual y nos cluba stima Racing Club Aruba.

RCA pa bida. Masha danki.

**Pedro 'Shon Pe'
Krozendijk.**